



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ
Orthodoxorum Medicorum Patrono.

QUÆSTIO MEDICA;

QUOD LIBETARIIS DISPUTATIONIBUS
manè discutienda in Scholis Medicorum, die Jovis vigesimo-octavo
mensis Januarii, anno Domini M. DCC. LI.

M. CAROLO GEILLE DE SAINT LEGER,
Doctore Medico, Præside.

*An homini maturo senescere, & ultimion mori, tam naturale, tam ineluctabile sit;
quam adolevisse, & maturuisse?*

I.



OMO natus de muliere, brevi vivens tempore, repletur mul-
tis miseriis. Fames, sitis; caloris frigorisque vices; morborum
invisa cohors, incommoda pauciora sunt, quibus humana cru-
ciatur infirmitas. Mentem exagitant affectus inordinati, versant
in modum tantò saviozem, quò mens corpore superior. Labo-
ribus jactatum assiduus, hominem excipit lenta canities, instan-
tis à tergo mortis prænuncia. Genus Iapeti diceres prosperos ibi portus con-

Job. 14. 1.

Mecæn.
apud Senec.
Epist. 101.

tigisse; mors ubi proxima; malis finem datura est. Verùm audax omnia per-
peti ruit per vetitum & nefas. Gravis annorum pondere senex inculat barbariem
immitis *Atropos*. Indocilis mori, pacificur quodcumque volueris aliud. *De-
bilem facito manu, debilem pede, coxâ: tuber adstrue gibberum, lubricos qua-
te dentes. Vita dum superest, bene est.* Non desuerunt, grandævis adeò pro-
num est insanire, qui circulatorum ludificati fraudibus, vanarum artium, auro ca-
riorem, redimebant opem, quâ lethum à cervicibus propullarent *adyatos*. Spar-
ta hinc incantamenta, vulgatæ artes Medæ, penes quas & lucis & umbræ fabulaban-
tur imperium. An Agyrtis solum, an primævis sapientiæ cultoribus absurda hæc
placuerint, nostrum non est definire. Asclepiadarum è gente nonnulli, qui-
busdam in plantis longævitatem antiquitùs fortè reposuerunt. Sub primis apud
nos Pyrotechniæ primordiis, ipsam immortalitatem adeptam jactabat artifi-
cum vaniloquentia. Quas dum captat vulgus fallacias, Immortalis Harveius
oculo subicit circulum sanguinis. Sed proh dolor! De invento statim atque
renunciatur orbi medico, non inferioris notæ viri collaborant, strophis ut
fidem verbosis faciant. Quippe somniarunt, quòd si beneficio circulationis,
ægotanti vel effeto affunderent homini, vegeti sanguinem animalis; redinte-
graretur decumbenti fanitas, seniori juvenus florida. Quid pluribus immo-
rer? Auræ vitalis appetitus impotens, quibusvis illudat *quorum stultitia questus im-
pudentia est*. Sapiet qui; probè gnarus non solâ sanguinis intemperie, sed & ma-
jori solidorum vitio mortem succrescere; vitam affirmaverit (si tamen annis in-
gravescere datum est) describi circulo, quo peracto, moriendum. Sapiet, qui
tales in corpore causas mirabitur, unde certis legibus incedant adolescentia,
ætateque virilis; quarum decrementum, senectam; quies porro mortem adscif-
cat.

Phædit. 1. 2.
Fab. 14.

I I.

SUBSTANTIÆ duplicis consortio factum hominem vivere nemo nega-
verit, quamdiu mens & corpus modo qualicumque agunt in invicem,
ab invicem patiuntur. Babylonios frustra tentâris numeros, scire si quasie-
ris vitale quodnam vinculum substantiis interfit adeò disparibus. Nunquam
fallax experientia, unum hoc docuit, singularem affectum animæ conditioni
determinatæ corporis individuum ire comitem. Mentis ergo mutationes, imò
vitæ mortisque causas, oportet uno quæramus in corpore. Jam verò (a) *cor-
pus humanum constat ex fluidis & firmis, docet Anatome.* (b) *Microscopia ite-
rum, iniectiones, vulnera minima, medicamenta vescicantia, atrophia, exsicca-
tio, docent solida nostra comparata cum humoribus, valde pauca haberi.* Scili-
cet in fluidis germen est solidorum, quæ suâ in origine certè liquida sunt.
Quod autem futurum est exinde discrimen; in contactum, in quietem, co-
hæSIONEM, figuram refundendum, clamat *auto-psia*. Opus quidem Anthropo-
geniæ, primis ab initiis exploratu difficillimum est: imò fortè nunquam
erit inconcussum quânam arte fiant prima embryonis delineamenta: ve-
runtamen ab illo penè ipso temporis articulo, quo vitæ insufflatur hali-
tus, sœtum ad usque perfectum; constanti paruit experimentorum fide, par-
tes homuncionis quascumque firmas è fluidis singulatim emergere. Illarum igitur
primigenia rudimenta sunt, ultimæ solidæ fluidorum moleculæ; sin minùs
innatantes humoribus (c) particulæ terrestres, instar atomorum, simplicissi-
mæ; corpus unde compingi primum, in quas ultimò resolvi, calcinatione
docemur, aut putredine. Binas ergo fingatur atomos juxta se quiescere; quæ
interim si cohæreant interposito glutine; nudo vel invicem contractu quan-
doque facientur; simplicissima surgit exinde fibra, qualem ratio potius, quàm

(a) Boe-
rhav. Instit.
Med. n. 39.
(b) Idem
Ibid. n. 440.

(c) Sæpius
apud D. Hall.
& illust. Comm.
t. 3. p. 637.

5
 sensus attingit. Simplicium (d) parallelo fibrarum ex ordine, simplex iterum nascitur membrana, quæ, si revolvatur, cylindrum exit in minimum, è quo partes demum organice fabrefiunt. Quà nimirum sapientiâ, motûs in gratiam & flexilitatis, infinitæ numero corpus solidum distinguunt machinulæ, quas inter decurrit humor irrequieto gradu profluens; eadem sanè coalescit pars omnis organica capillamentorum fasciculis, involucro singulo, necnon intermedio liquore discretorum. Inde certa partis cujuslibet flexilitas, prona mobilitas; spontanea quin imò ductilitas. Recentia namque corpufculi solida singula, totidem tubuli sunt in quos impelluntur humores. Tenella porro filamentorum stamina vi fluidorum distrahenti, in promptu est quàm faciliè debeant obsequi. Humores interim, ubi primùm coercentur, frictum ad latera vasis inter movendum oportet patiantur: repetitis comminuantur ictibus: crasim longè diversam induant. Quid plura? Jugi tum circumductione, tum accessione, miscellâque adventantis materno de corpore sanguinis, purpureum in laticem, in liquores tandem hominis inquilinos omnes convertantur necesse est. Nul: autem ibit inficias, humores absolutum posteaquam attigerunt gradum elaborationis, à benignâ tum demum indole deficere; ideòque blandus alter affundi postulat, qui contemperet priorem vergentem alioquin in infensissimum alkali. Sed & solidorum damna nihilò seciùs farciri planum est. Nisu quippe fluidi, superficiem vasorum internam distractum iri, sensum sine sensu abradendas tenues particulas, manet indubitatum. Corpus itaque vix dum omnium compos organorum, citò destrueretur ipsa vi vitæ; particulæ nî succederent abasarum vicariæ. Animalis ergo vita cancellis hisce concluditur, liberè moveri, deperdere, resciri. Horum tandem unumquodque aliter & aliter obrinet, pro diversâ vitæ periodo.

III.

CORPORA nostra, quò propiora prima suæ origini, eò plus excrecere, cogit firmarum distractilitas obsequiosa partium; cogit exsuperantia fluidarum, facili negotio convertibilium in succos omni dote alibiles. Quid aliud præstabit etenim vasorum repagulis coercitus humor, nisi ut ab interioribus undique depellat extrorsum, fines vasorum ultimos? In id autem collineant vires ita præsentis efficaciz, statim ut pensitanti pro rato sit, ullâ certiori momentorum energiâ sanè vix obtinendum hujusmodi finem. Cor scilicet ubi primùm incipit salire, quantum sanguinis thalami capiunt, impetu magno trudit in vas conicum simul & elasticum, liquore quin imò jam ante turgidum. Præterquamquod autem prior ponè consequenti moræ sit; convergens fabrica canalıs, impedimento longè majori est progressioni, projecti cæteroquin summâ velocitate sanguinis. Hic ergo moræ quoniam impatiens, acceptam à corde vim integram ab ingressu statim exeret vasis in latera, quæ cedant illico, majorem in circulum se duci patiantur æquum est; mox autem fluido renitantur incumbenti, coerceantque cavo iterum angustiori. Nullus interea patet ad cor adscensus. Demp̃a parte paucissimâ quæ sub ipsâ depressione regreditur, sygmoidæ refluxum negant valvulæ. Negat arteria se coarctans à maximâ in minorem, nisu succedente, diametrum. Humor itaque vasorum fines præterlabetur ultimos, vim suam impendens in longitudinem, quæ ducetur in majus, effectu tantò quidem obsequentiori, primâ quoddã atate cor micat multò frequentius; contractio est iterum, cæteris paribus, omnium maxima. Cohæsiõnem huc adde solidorum perfectè minimam, erit utique pauciori cum renixu insita vis impellens efficacissima; proindeque major quæ sit unquam futura, vasorum elongationis necessitas. Quoddã autem, ineunte vitâ, laxiorivine

(d) De Gon-
 ter. apud D.
 Hallet. Ibid.

Boerha.
 inst. Med. 466.

culo cohæreant solida; millenis etsi comprobari possit argumentis, punctum omne feret adducta firmarum è fluidis emersio. Rigiditatis etenim causas inter principes, jure quidem assignantur particulæ terrestres, quæ posteaquam factæ densiores, majori superficie se tangunt immediatè, se se validius invicem attrahunt, quàm ut dimoveantur arietantis humoris ictibus. Primis autem vitæ temporibus rara admodum terra est: intervallis atoni differunt luxuriantibus uberiori glutine, quod se duci facilè patitur in omnem loci differentiam. Verùm non satis est invenisse causas, unde corpus producatur in longius. Non invalesceret; quin potiùs periclitaretur exinde salus mortalium, singularis nisi conflueret humor aptus reficere natum à motu detrimentum. Fibris namque tenerioribus, ubi contigerit eà vi distendi, quæ major sit elementorum attractione mutuâ, distabunt illorum exinde termini; solvetur tractus solidorum, inani relictâ, vel debiliori saltem cavitare, quâ sensim sine sensu latiori factâ, vis vitæ citò satisceret. Inest quidem humoribus unde restituatur, deducendo quod avulsum est. Verùm haud multò post, ab horis nimirum aliquot exinde marcescet ros, unde scaturit illa regenerandi facultas. Fluida nempe, nutritiis dum sic exhauriuntur partibus, persistente motu tandem putrescunt. Quod omnem extra controversiam factum est, periculo jejunantium in quibus urina sudorque fatent ab abstinentiâ paulò diuturniori, ipsaque innocens alioquin anima olet gravissimè. Fons alter itaque plenior cornu debuit ferre suppetias. Sed alimentorum in assumptione sufficiens subsidium præsto est. In infante coctionis organa nunquam feriantur: in sætu quidem actiosa minis; sed restauratione minis iterum indiget fœtus, ut potè quiescere utero, paucioribus itaque damnis obnoxius. Interea tamen à matre traducitur in prolem, ingens copia succorum, abundè qui redimant atoniam ventriculi. Maternum in corpus hi licet apti jam concrevere, formicâ nihilò majorem ne fœtum offendant, atteruntur uteri colatoris, usque dum (a) *passa* transeant in speciem *amylaceæ*, quæ primis à conceptu temporibus, calore motûque facta semper fluidior, homuncionis molliusculos operâ facili fingitur in artus. Illi statim atque consistentiâ, situ, numero, formam hominis referunt, (b) subit liquor alter, paucos unde post menses, fœtus in molem assurgat adeò portentosam. Scilicet innatât humori lymphatico concrescibili verè nutritio, qui tramite quidem obscuro, per poros Chorii bibulos ex utero trahitur; fistulis inde sorbetur inhalantibus, quæ concavam intra superficiem hiantes Amnii, profundunt ibidem, quo fœtus victitat, blandi saporis subsalsum laticem, sero sanguinis quàm proximè simillimum. Fœtus ergo non mirum quòd solis noveni mensibus eà proficiat ratione quali, si pergeret annis increfcere singulis, intra breve tempus terrarum orbem experiretur angustum. Verùm infans anno primo longè minùs proficit; minùs augetur iterum annis succedentibus, adeò ut à vigesimo, ad quintum vigesimum, paucis admodum uncis increfcat. Causa est in promptu. Parciori cibo dum alitur, subeunt excretionès, inexpertæ priùs dispendia, quæ partem alimentorum demunt potissimam. Aër, onus insuetum, toto reprimite pondere vim expellentem vasa, quæ minùs in longum, magis autem in capax ampliari oportet. Ergo latera minorum ad invicem apprimunt; angustant cavitatem, delent. Unde corpori robur additur quidem, at simul accedit incremento renixus eò validior, quòd in diem cedunt momento, fluida. Crescit tamen infans, & quia lacte, tum à lacte cibis copiosè vescitur euchy-mis, ultro vertendis in gelatinam; & quia vix primùm à pastu temperat, dormitat usque dum excitet altera mensæ necessitas. At pueritiam si semel attingit, mille modis exercet mûsculos. Longâ in arundine equitare amans, saltitat;

(a) Boerhaav. instit. Med. n. 675.

(b) Id. Ibid. n. 682.

corpus huc & illuc agit; gaudet, irascitur; adeoque liquores inæqualiter omnino circumduci, perspicuum est: majora interim vasa nimis iusto repleri; lateralia comprimi rursus & occalescere, quæque iterum adolescente puero, jam jam futura sunt longè pauciora. Vel enim musarum sacris indulgere iustus est, duris vel laboribus admoveere manum; quæ licet in annos tractu longo differant, impræsentiarum eò coincidunt, ut corpus fluidis, pro suo cuique jure; defraudent partibus. Advolat exinde pubertas, genus trahens omne cupidinum. Menas alter dapibus onerat. Alter Iaccho venas ut semper inflatus hesterno, spirituosus ardet inebriari liquoribus. Maxima pars, eheu! Veneri litat maturius. Totidem de causis terræ major obtinet ratio: arefcunt humores, eò usque dispereunt, ut non ampliùs solidis prævaleant, nec ultra resistentiam à corde protrudantur. Vis effræna libidinum ponit celerius quidem incremento metam. Juvenis attamen imberbis moderatè corpus exercens, in cibo temperans, vitam perfectè cælibem agat abstemius; beatè gaudeat animi tranquillitate, &c; terminus tandem futurus est, quo scilicet, expresso per compressiones articularum aqueo principio, gluten magnâ parte siccabitur; adeoque quod hæret ossibus, eò usque solidabitur, ut extremis ossium Epiphyfes adnatæ tandem in ossa transierint. Quo quidem in statu punctum est, ubi jam cor haud sufficit extendendis ultra solidis.

I V.

PERFECTUS homo, ad omnes alacer vitæ functiones, annis tameris videatur constare sibi pluribus; statu nunquam in eodem verè permanet, aliqua perpetuò pergunt elidi vasa: neque tamen omnis perit citò constantia. Reciproca sistit quidem actionum æqualitas cor inter & vim superandam: chylopæa verò perinde ac sanguifica non remittunt organa. Licet enim humores haud mediocrem sui jacturam experti sint, ventriculi tamen & intestinorum cavitatibus, affunditur eorum copia quæ valeat alimentorum diluere moleculas, solutis conciliare fluorem partibus. Bilis etiam quam nemo recusabit pro causa principe quæ miscibilia reddat oleosa cum aquosis, ætate virili potissimum eâ pollet amaritie quâ suo rectius munere fungatur. Liquores denique digestionis dum vacant quantitate adhuc & qualitate laudabili; famulantia eidem operi solida, tono gaudent quo major alter toto vitæ decursu non supponi queat. Namque motus in corpore nullus exercetur, nisi ab immediatâ musculosæ partis actione. Jam verò musculi vis æstimatur ab actione singulari fibrarum, multiplicatâ per earumdem numerum. Quò major itaque numerus, quò major singularum faculties, tenacitas; summæ momentum erit sub illo respectu tantò validius. Porro continuam ob extenuationem aquosi glutinis, tenacitas ætate virili tanta est quanta esse potest, salvâ functionum libertate; siquidem ad gradum paululò majorem de flexibilitate detrahitur, fibræ degenerant in rigiditatem quâ positâ turpis senectus incumbit. Sed iterum in viro musculi torosi maximam præ se ferunt fibrarum crassitiem: quin illæ numerosiores quoque sunt. Namque Mercurius arte Ruyschianâ penetrans in intimam musculi substantiam, certè docet medias inter carnes ubique disseminari exiles arteriolas, quæ compressionibus assiduis simul ac orbantur cavitate sua, chordam referunt elasticam actionis musculosæ capacem. Virilis quapropter ætatis omni stadio, ventriculi intestinorumque fibris muscularibus vis ea est quæ chylum parare valeat uberrimum. Quoquidem in opere maxima quoque est, ob incrementum actionis musculosæ, vis accessoria septi transversî, musculorum abdominalium, articularum circumpositarum. Chylus ergo sincerus, suis in ætate virili non deficit promptuariis. Nec certè remissior erit hujus in sanguinem elaboratio. Quippe causa quæ tonum so-

lidorum intendit in viro, diffunditur in omni corpore ne exceptâ quidem molliori compage pulmonum, in quibus insuper vis comprimens ab aeris pondere necnon elatere nata, potentiùs nunquam in actum erumpit quam ætate virili. Namque thoracis area tunc ætatis capacissima, locum adhuc pro majori pulmonum expansione recipit ampliorem à recessu diaphragmatis, inter inspirandum quam maximè complanati versùs inferiora. Omni igitur officinâ suâ sanguis actiones in viro patitur efficacissimas, tam à pulmonibus quàm ab arteriarum superadjectis viribus, & ab ipsâ pressione validâ musculorum. Copiam itaque nihilò pauciorum humoris nutritii vis vitæ parabit. Jam verò fistularum myriadibus oclusis, de mole parciore exhalat quantitas. Amplior ergo succedet corporis habitus; subsequetur obesitas, quæ non aliud est nisi cellulis interfusis adeps, inibi scilicet adactus, quòd ad crepaturam tumens arteria, cellularum solis in recessibus diverticulum par est invenire. Non mirum ergo quòd actionibus vitæ validissimis, homo dum se destruit, perstare tamen appareat. Namque si quando ratum est, humano de corpore $\frac{4}{9}$ avolare decennio; inaudita sui dispendia feret inoffensus homo, qui sinu suo sovet, unde supplementum largiatur. Talo verùm incedit fluxili, jugiter ad occasum properans vitæ constantia. Aquæ residuum omne subripiat necessum est, generatus calor ab oscillationibus arteriæ violentissimis. Tritus videlicet in igne colligendo quantum possit, omnibus notum est. Cum autem ætate virili, solidorum vires ascenderint extremum ad apicem, & intereà difficiliùs multò sese penetrari sinant: tritus inde futurus est omnium maximus; proindeque toto furens æstus in corpore, qui gradu leni caloris avolantem in auras, aquam omnem exhauriat. Quantum verò detrahatur aquæ, rigiditatis tantumdem artubus accedit. Scilicet aquæ decrementum, terræ pondus auget præter modum. Rigiditas autem est indomita terræ. Hujus intereà particulæ statim atque densantur, magnâ parte jam extenuatum gluten comprimunt attractione reciproca, donec pars aquosa glutinis exfudet, remaneat oleosa tenacior. Olei porro superstitis ope, elementis elementa, fibræ fibris eò usque compinguntur, ut in massam obrigeant inflexibilem, exsuccam, ægrè admodum appositione succi nutritii refocillandam; ut argumento sunt, in senibus operosioris alæ fracturarum vulnerumve consolidationes. Alibilis autem inducunt succi penuriam, vires confractæ solidorum, ipsæque temperies humorum sicciore. Vasa namque nedum valeant motui jam ineptos humores ad gradum conquassare, qualem functionum postulat integritas; ut contra conatu propellant admodum imbelli. Hæmatosis itaque peccabit omni de capite; tam instrumentorum culpâ sibi præfectorum, quam antecedente vitio *χυλοποισις*. In eo quippe siccitatis gradu rebus constitutis, ori deficit saliva, stomacho mucus, gastricus humor ventriculo, suis pancreati latex. Hujus laticis, exfors facta bilis, menstrui suâ cedit facultate. Intestinatorum, ut ante, millibus è villis non pluit copiosus imber, pastam qui perfundat cibariam, humanis incipiat assimilare liquoribus. Partes itaque crudas, ficas, terrestres, lactea bibunt, quales exinde sanguis vix educi queat; tantòque minùs iterum exurgere possit, quòd accedit *ἀπεψή*, pulmonum arteriosisque simul systematis impotentia. Non sanguis igitur floridus, spumescens, coccineo colore rubentes densatus in globulos, vasis excipietur; sed humor excrementitius, iners, adeò terrestris, ut ubique in cellulosis corporis partes, *veram terram pro vapore deponat*, usque dum aridior semper factus, eam conceperit acredinem, quæ solida mollia rigiditatis eò deducat, ut cordis vieti vires obruant. Acrimonix verùm advocandæ quot causæ collatis viribus conferunt! Humorum ubique stagnatio suppetit. Halitusorum oclusis undique vasculorum

Bernoul.
apud D. Hall.
commen. inst.
Med. t. 3. p.
677.

D. Hall.
prim. lin.
Physiolog. n.
236.

7
 cavitatibus, emunctoria supersunt pauciora certè, pro iustâ depuratione sanguinis. Verùm ante alias causa parens acredinis, aquæ dissipatio est. *Aqua videlicet ne oleosis quidem exulans, est humor princeps, longèquæ abundantissimus omnium liquorum qui in sano corpore humano deprehenduntur.... in hac igitur aquâ reliqua elementa omnium humorum hominis soluta fluunt mista inter se, & fluentia continentur, conservanturque.* Ergo posteaquam evanuit aqua, non ampliùs humoris qui superest elementa miscentur inter se, nec soluta fluunt. Una vasculoso systemate terra volvitur acris, ponderosâque tantò magis, quòd ipsi jungitur, principiis ante confusum aliis, oleum. Hujus intereà soluti compedibus, sales impinguntur massæ solidorum: illa ferruminant in duritiem ferme lapideam. Scilicet in ossa vertuntur arteriarum involucria: tendones abeunt in cartilaginem: musculi pro carnosâ mole, nil nisi dealbicantem, aridum tendonem exhibent. Quibus in angustiis, primùm aboletur aeris usura: cordi dextro sanguis congeritur: consepultis viribus cor ipsum occidit aliquandiu palpitans, donec longa quies annorum abruptit seriem.

Boerha.
 Chem. tom. 7,
 p. 386.

V.

NEQUE protrahi potuit certa moriendi necessitas, *etsi terminum mutet varia cordis ad solida proportio, vis coëtrix alimentorum, indoles sanguinis, calor externus aeris, &c.* Si tamen in re lubricâ, locus est artis industriae, spem finit inchoare longam, sapiens vitæ consilium. Si nimirum sui compos juvenis, parcat in usus detorquere cupidinum, quotquot Adoranda DEI Munificentia concessit homini bona, vitæ necessarios in usus; tardiùs attinget limites incrementi positos. Maturitas exinde fundamento structa firmiori, stabit iterum patientiori curriculo, tempus senectuti datum superans. Illa porro nec iners, importuna, gravans, sese qualem effert apud quos ætati solet anteire: sed viridis adhucdum & cruda, mortem intuebitur longo proximam intervallo. Ita sanè, cæteris paribus, quibus à puero fuit in vivendo norma, vivaciori videntur sanitate perfrui. Vulgaris hystoria est longævi Britannos inter hominis, qui Magno referente Boerhaavio, caseo delectatus plurimùm; ætatis anno centesimo, virginem thalamo receptam fecunda prole fecit parentem. Leydæ vixit alter qui seculum decimum septimum natus viderat, & finire, semper sanissimus. Interrogatus quibus artibus ad tantam ætatem pervenisset; solebat respondere, *eâ methodo, quam nolis imitari, moderatione & sobrietate.* At valetudini parare præsidium quo tempore corpus exhaustum morti debetur proximæ, desipientis est. Falso venditant Antidotum nomine, qui Chemicis in preparationibus, aut in ipsâ transfusione sanguinis, senectuti quærunt Medicinam languidæ. Chemicis valeant explorare penitissimam corporis compagem: lecta parent remedia, quæ *φάρμακον* locupletant: non autem experiantur quod nefas assequi. Vanæ species & ægri somnia sunt, Universale Menstruum omnes ad unam obstructions referans: Elixirum Paracelsi, quo vitam ex arbitrio quam vellet longam, addere despondebat: Helmontii liquor è cedro paratus, quo viveret in secula cedrofenex annosior: Magnes Artèphii, quo juvenili de corpore vitales rapti spiritus, lagenæ committerentur donec intermorituri præ grandævitate, hominis vitam sustinerent ad annum millesimum. Omnia de genere hoc fabulosa, digna sunt quæ prosequantur artis *χημικοῦ* studiosi. Illi si verba dederint imperitæ plebi, Medicorum nemini fucum facient. *Hoc utique certum est vim sani corporis posse transire in corpus effatum. Nam virgines quæ cum aniculis dormiunt, certum est consumi; vetulas verò melius inde habere.* Sed arti non ultra datur asurgere. Namque singamus penes esse Chemicos, meliorem ad crasim humores corrigere; hoc opus, hic labor est, restituere deletas vasorum cavitates. Quod si moliantur

(a) D. Hall.
 prim. lin.
 Physiol. n.
 259.

Boerha.
 Inst. Com-
 ment. tom. 6,
 n. 1066.

Ibid. n. 1065.
 pag. 353.

imprudentes, in vanum laborabunt. Artem namque DEUS nullam dedit mortalibus, quæ diducat parietes vasorum *κεραγγίς* mutatorum in ligamenta: nullam DEUS dedit artem quæ, lateribus vasorum inviolatis, saxum solvat connatum medius illorum cavitatibus. Nec etiam temerè confidant Chemicæ, se suâ saltem industria præcavere potuisse, quod quando natum est tollere nequeunt. Falluntur & fallunt si confugiunt aliò quàm ad mediocritatem in vivendi genere susceptam à teneris. Nulla quippe prudentia est quæ motum vitalem infringat, quo tempore summa vis hujus notitura est æqualitati fluidorum cum solidis: nulla prorsus industria quæ partes rigidas ad primævam revocet molliem & flexilitatem. Non felicior ergo foret transfusionis eventus, si quis *λαοδαιδαλος* eam usurparet eundem in scopum. Illam enim insituant multò ante quàm corpus exolescat; quid lucrantur aliud, nisi quòd faciunt credulis discrimen vitæ certissimum? Vasa quidem replent, non nutriunt: quandoquidem *ad constantiam vitæ similis continuandam, opus est ut tantum & tale... restituatur, quantum & quale... perditum est.* Sanguis autem brutorum animantium, immane quantum discrepat ab humano sanguine! Quin eadem alimenta diversis ab hominibus adsumpta, mutantur in humores omnino diversos, qui suâ se produnt *ιδιουνομασία*, quam aded sollicitè dijudicant canes odorilequi *herum per compita atque in errantium hominum tumultuario concursu cerò detegentes.* Longævitatis itaque spes ulla potior nedum arri-deat à transfusione sanguinis, quin imò periculosissimæ plenum opus est alexæ. Cum autem inter affundendum sanguinem advenam millibus insuper obnoxia jaceat incommodis, quibus arte nulla datur opitulari; sapienter quidem edito solemini cautum est, ne quid in posterum detrimenti caperet civitas à capitali tentamine. Ergo senibus annosis ex ipsius naturæ placito, una calcanda superest via lethi.

Ergo homini maturo, senescere & ultimè mori, tam naturale, tam ineluctabile est, quàm adolevisse & maturuisse.

DOMINI DOCTORES DISPUTATURI.

M. Ludovicus-Gabriel Dupré.

M. Pascasius Borie.

M. Joannes Bessé, *Dotarie Hispaniarum Regine, dum viveret, Medicus Primarius.*

M. Antonius Petit, *in Matro-narum gratiam Anatomæ & Artis Obstetriciæ Profes-sor.*

M. Florentius-Carolus Belloz, *Scholarum, Professor des-ignatus.*

M. Antonius de Jussieu, *Regi à Consiliis & Secretis, Regiæ Scientiarum Academiæ, Regiarumque Societatum Angliæ & Prussiæ Socius, Botani-ces in Horto Regio Parisiensi Professor ac Demonstrator.*

M. Stephannus Pourfour du Petit.

M. Ludovicus Pathiot.

M. Joannes-Baptista-Thomas Martineq, *ex-Decanus & Academiæ Censor.*

Proponebat Parisiis JACOBUS-FRANCISCUS LATIER, Rothomagenfis, saluberrimæ Facultatis Medicinæ Parisiensis Baccalaureus, A. R. S. H. 1751. A SEXTA AD MERIDIEM.

Typis QUILLAU, Universitatis & Facultatis Medicinæ Typographi, 1751.

Boerhaav.
Inst. Med. n.
436.

18. chem.
tom. 1. p. 36.